



Sabtu, 21 September 2024
Ogen: 02 Samuel 2: 24-28



Malemna Nnggeluh Dame



Timur tengah e me taneh para nabi arah telu agama e me Jahudi, Kristen ras Islam. Pesan perdamen ras kiniulin reh i bas taneh e. Tapi ribun tahun, labo lit perdamen si turah. Benang kusut radikalisme, konflik, kerangapen ras perang terus terjadi secara berulang. I bas abad enda pe, titik terang labo denga teridah. Uga maka Timur Tengah terus ergejolak enda? Sepanjang sejarah, Timur Tengah jadi sada ingan si penting subuk secara geografis, strategis bagepe budaya. Emaka perang guna mpebelang ras mpertahanken wilayah lalap nge terjadi. Adi si nehen i bas ogenta sendah, maka terjadi me perang saudara antara Juda ras Israel. Ibenaken arah tantangan adu rubat anak perana i bas Israel ras Juda. Emaka nggo sibunuen kalak enda kerina. Dungna terjadi me perang si mesangat janah italuken tentara Juda me tentara Israel. Janah labo terjeng bage ngenca, maka tentara Juda si ipimpin Joap ngayak-ngayaki tentara Israel si ipimpin Abner. Kedungenna, erkiteken latih iakap Abner rusursa iayak-ayaki tentara Joap, maka Abner ngerana man Joap maka labo lit ertina perang rasa lalap sebab si pagitna nge ngenca kedungenna. Emaka meg i kerna kai si ikataken Abner e, maka dungna ngadi me tentara Juda ngayak-ngayak bangsa Israel. Si pagit nge ngenca kedungenna. Kalimat enda jadi sada perenungen man banta maka labo lit riahna, malemna ras gunana erperang adi labo ntebu nanamna. Si entebu nanamna terjeng ngeluh alu dame nge ngenca. Adi perdamen terjeng teori ntah konsep denga, maka labo pernah terjadi perdamen e. Tentu kerina kalak erlumba maka konsepna nge si benarna piahna labo pernah terwujud perdamen e si lit lalap nge perubaten. Dame arus melampaui identitas. Identitas e me jati diri manusia si lalap melekat ras kelompokna. Identitas kelompok arus terus ilampaui maka kalak ngasup manyadari dirina maka ia warga alam semesta. Bagi Israel ras Juda, ikataken Abner, "kami pe teman sebangsandu nge".